



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 10



Opposition MLA aikati BJP nung adentsü: Himanta Biswa Sarma

Tokyo Olympics: PV Sindhu semi final-i iogo



VOL. XVIII NO. 287 (ADOK 287) DIMAPUR

KÜPTOKNÜ (SATURDAY)

CHITENI (JULY) 31, 2021

₹ 5.00

NLA session atema Opposition-i tasüngdangba 27 benoka lir

Kohima, July 30, 2021 (TYO): Nagaland Legislative Assembly (NLA) indang anogo asemnü monsoon session atema Opposition züngsemtemi tasüngdangba 27 benokogo aser iba dakji alia Naga yimten tebilemstü aser COVID-19 indang jembitsü.

August 3 nungi 5, 2021 tashi assembly session agitsü aser Naga People's Front (NPF)-i July 20 nü opposition maliba sorkar akümtsü indang agizükra, 13 buba NLA nung opposition melii agiba mezüngbuba session asütsü.

Nationalist Democratic Progressive Party (NDPP)-i opposition maliba sorkar indang tebilemba agizükogo saka parnok tamasa BJP den asüngdangteper ang telemtetba agitsü ta shiogo. Ajisüaka, Nagaland nung BJP MLA temi iba atema telangzüba kecha magütsür.

"Naga yimten tebilemstü ya kanga tongtipang saka BJP ya high-command Party ka lir anungji Nagaland BJP-i onok sasa telemtetba magitetsü" ta Nagaland BJP president Temjen Imna Along-i ashi.

"NPF Legislature Party indang tebilembaji tajung saka iba ya mashileni mangatetsüla. Naga yimten latetsü atema onoki Opposition maliba sorkar ka akümtsü shidangogo" ta NPFLP secretary MLA Dr Chumben Murry-i ashi.

Külen, Speaker Sharingain Longkumer menden ser NLA Business Advisory Committee-i Session Tibuba atema sentong renemogo.

Session nung question hour dak alia tasüngdangba 20 dak tema lir aser iba denji Core Committee on NPI indang maparen dak sendakba onüktem benoka jembitsü.

(Maneni tapak 10 nung...)

Dimapur district ktdangsurtem arrtsü atema senden nung aden

Dimapur, July 30, 2021 (TYO): July 30, 2021 nü Nagaland kübok Dimapur district aser Assam kübok Golaghat aser Karbi Anglong district ktdangsurtemi arrtsü atema senden ka menogo.

Sendenji CCI Guest House, Bokajan nung amen aser Dimapur nungi Deputy Commissioner aser Commissioner of Police aden.

Senden nung state ana tsüngda arrtsülen tensa indang jembidang district ktdangsurtem mapang shia ajurutepe ajanga tawa arrtsü dak sendakba ken o tem madoker aser maneni ktdangsurtemi arrtsü atema

sendentem amentsü molungtepa liasü, ta Dimapur DC Rajesh Soundararajan-i sangdong ka nung ashi.

DIG Range Assam-ia district ktdangsurtem tsüngda mapang mapang shi ajurutepe arrtsü dak sendakba tebilemstütem lemsatepe ajanga tensa süngjema lir ta senden nung ashi.

Taküm Assam Assembly election tiptema agitsüa yaritepe atema Karbi Anglong aser Golaghat Deputy Commissioner aser Superintendent of Police temi Dimapur DC aser CP dang pelaba metetdaksü.

Kohima DC-i RAT indang metetdaksür

Kohima, July 30, 2021 (TYO): Nisung ka dak COVID-19 positive ta putetra tanaben metendangtsü, ta Kohima Deputy Commissioner aser DTF Chairman, Gregory Thejawelie, NCS-i tanü ashi.

Maneni, Rapid Antigen Test (RAT) kits ajanga COVID-19 Home Testing asü dang ICMR-i lateta aliba ama inyaksüla, ta paisa tetuyuba agütsü.

Positive puteter ajaki 6909937493/9402823462 ajanga

District Surveillance Officer, Kohima nem osang sangoktsüsüla aser home isolation asütsüla, ta Kohima DC-isa metetdaksü.

Shirangba yimyabo lir sernung RAT ajanga negative putetertemi tekaratiba nung RTPCR ajanga tendangtsüla aser parnok 'suspect COVID-19' nisungtem ta ser anepalutsüla. RAT ajanga 'low viral load' alirtem dakbo positive meputeter anungji RTPCR test asütsüla, ta paisa ashi.

Assam aser Nagaland police tem border outpost nungi anientsü



July 30, 2020 nü Mokokchung district kübok Chungtiayimsen nung Nagaland Deputy Chief Minister aser Home Minister, Y Patton-i senden nung jembidang agiba noksa angur.

Dimapur, July 30, 2021 (TYO): Nagaland aser Assam Police temi Assam aser Tzurangkong arrtsü nung pei pei outpost agientsü molungtepogo, ta Deputy Chief Minister aser Home Minister, Y Patton-i ashi.

July 30, 2020 nü Chungtiayimsen nung Y Patton-i Ao Senden, Tzurangkong Union, Northern Sumi Union aser Tzurangkong Naga Youth Front den senden amendang iba osang metetdaksü.

Assam aser Nagaland Chief Minister temi arrtsülen tensa junga ayutsü atema police tem agientsü molungtepogo, ta paisa ashi.

"Ajisüaka, Assam police-i parnok indang outpost toktsür mao tashi Nagaland police-i outpost metoktsüsü" ta Deputy Chief Minister-isa ashi.

"Taoba mapang Assam den

tenangzükteptem agiba nung arrtsülen nungi State police force tem anientsü molungtepa liasü saka Assam-i ibaji meinyak aser outpost teimba aküm. Nagaland-ibo police aniena liasü saka asenoki kasa aibelen masütsü" ta Patton-isa metetdaksü.

"Nisungtemi pei sasa meinyaksüla saka state sorkar nem osang sangoktsüsüla aser asenok külemi tebilemstü koktetsü atema inyaksü" ta Y Patton-isa ashi.

"Arrtsü tebilemstü ya tematiba jenjang nung angatetteptsü atema benogo aser iba atema mashii mapang nung kü dang ajuruteptsü akok" ta paisa nangzük.

"Tzurangkong nung alirtemi tensa tamajungba mekümdaksüba atema pelar. Ni Assam DGP den ashishitep aketba tesem nungi police anientsü atema jembiogo" ta DGP

Nagaland, John Longkumer, IPS-ia ashi.

"R o n g s e n k e t z ü n g tenokdangba agütsüba aser tashiyim mapa inyakba state ana Chief Secretary jenjang nung jembidar aser angatetteptsü meranger. Akokba tashi teka ia merarateptsüla" ta Commissioner Nagaland, Rovilatuo Mor, IAS-ia senden nung ashi.

Iba senden nung mendenji ADC Mangkolemba liasü aser Advisor Dr. Longrineken, Mokokchung DC, Mokokchung SP, Ao Senden President aser Tzurangkong Union President nungertemia o jembi.

Tanü Deputy Chief Minister den DGP, Commissioner Nagaland, IGP (Range) aser Joint Secretary Border Affairs nungertemi helicopter ajanga Vikuto aser Ao Senden yimtsüngtem reprangdanga liasü.

COVID-19 Nagaland: 60 dak putet, 75 taneptsü angu & 5 asü

Kohima, July 30, 2021 (TYO): Hokolbarnü Nagaland nung nisung 60 dak COVID-19 putet aser 75 taneptsü angu.

"Tanü nisung 60 dak COVID-19 aliba putet. Parnokji Kohima nung 21, Dimapur nung 13, Mokokchung nung 6, Wokha nung 5, Peren nung 4, Mon nung 3 aser Longleng, Phek, Tuensang o Zunheboto nung anana (2) lir. Parnok züngsema nisung ajak agi 27,713 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü COVID-19 puteta alir nisung 75 taneptsü angu. Parnokji Mokokchung nung 30, Dimapur nung 19, Kohima nung 16, Mon nung 5, Longleng o

Wokha nung anana (2) aser Tuensang nung 1 lir. Parnok züngsema taneptsü angur 25,098 kümogo" ta paisa ashi.

Nagaland nung COVID-19 nungi taneptsü angur 90.56% lir aser nisung 1,274 anepaludar, ta Dr Kikon-isa ashi.

Hokolbarnü COVID-19 puteta alir nisung 5 asü. Kohima nung nisung 2 aser Dimapur, Tuensang o Wokha nung kaka asü. Parnok züngsema tasür ajak agi 561 kümogo saka nisung 14 bo tanga tashidak ajanga asü, ta paisa metetdaksü.

"Tang tashi nung COVID-19 alitsü akok ta temolung melembi bilemba sample 262,267 tendangogo. RT-PCR ajanga 102,443, TrueNat ajanga 67,712 aser Rapid Antigen Test ajanga

92,112 tendang" ta Dr Kikon-isa ashi.

"Brihostibar tashi nung nisung 613,975 nem COVID-19 vaccine indang dose 762,938 agütsüogo" ta State Immunization Officer, Dr Ritu Thurr-i ashi.



"Vaccine agirtemji frontline workers 60,768, healthcare workers 15,962, arishi küm 45 ser temapur 184,524 aser arishi küm 18 nungi 44 tsüngda alir 352,721 lir" ta paisa ashi.

"Vaccine agirtem rongnung nisung 148,963-i dose anaprong agiogo. Parnokji frontline workers 39,175, healthcare workers 12,406, arishi küm 45 ser temapur 97,066 aser arishi küm 18 nungi 44 tsüngda alir 316 lir" ta Dr Thurr-isa ashi.

Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aitsüsa kichiba (window & ventilation) lapoka yuang.
 Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.
 Pei meyong mobile phone, kumesü aser toothbrush nunger ama melentepa tamshi.
 Mozü achitsü agüja lira, aji shitak chiang.

Tango junga mesashiteta, teku ashiba, aketba aser temang metaba timtem lira yakta doctor bushiang.


DGP Nagaland ajanga kaket ka sayatsü



Dimapur, Chiteni/July 30 (TYO): Nagaland nung Police Department kübok unit ajak nem COVID-19 mozü aser chiyongtsü lemtsütsü aser NPRIS, PHQ ajanga sponsor asüba "Clinical Management Protocol: COVID-19" kaket sayaba sentong ka Police Headquarter, Kohima nung July 30, 2021 nü Director General of Police, Nagaland, T. John Longkumer, IPS ajanga moaja liasü.

Iba sentong nung jembiba mapang, Police Department nungi senior officer temi lungjemer meranga inyakba ajanga sentong nung takok angu, shirnoki state nung aliba unit ajunga nung COVID dak sendakba maparen balala asoshi lenmang bushia liasü aser ano Delhi nung teyangludak tesem nungi mozü aser danga chiyongtsütem indang indanga bener arutet, ta T. John Longkumer, IPS ajanga ashi.

DGP-i ashiba agi, Police Department nung COVID-19 cases ya 2338 liasü aser item rongnung sepai 2291 taneptsü nguogo aser nisung 11 süogo.

Iba tashidak nungi taneptsü

anguba jenjang kanga junga liasü aser iba atema Unit Commander aser senior officer nem tenüngsang agütsür, shirnoki pei unit indang barrack tem nung COVID-19 tashidak prokshia aoba anentsü atema COVID SOP aser protocol tem kanga junga angatetdaksü, ta pai ashi.

State nung vaccination drive agiba tsütsü Medical department sülenbo Police Department ya mezüngbuba liasü, ta pai ashi aser tang tashi COVID-19 mozü magi alirtem dang mozü ya agia iba tashidak prokshia aoba anentsütsü ayongzüka liasü.

Paisa ashiba agi, COVID-19 tashidak wara tenzüka sülen department nung inyakertem ya frontline worker kuma state nung tzüzüing-ozüing benokba tajungtiba nung amshi, nüburtem yarua Ganeshnagar nung yipten 1000 aliba Quarantine Centre ka amenok aser Chumukedima nunga yipten 100 aliba COVID Care Hospital amenoka liasü.

State nung COVID-19 tashidak wara prokshia aoba aziuoktsü aser sepaitem aser kinungertem, talisa meta tezülen aliba sepaitem nem iba tashidak

nungi jenbua alitsü atema mera balala agitsü angazükdaksütsü nükjidong nung iba sentong ya ayongzüik.

Police aser police kibongtem iba tashidak tamajung nungi kumzüka ayutsü tangatetba nung department den welfare society, Nagaland Police Risk Insurance Scheme ajanga NPRIS nungi COVID Emergency Relief Fund bendena COVID-19 mozü aser chiyongtsü alitsü atema sen lakh 35 tashi sanction süa liasü aser Police Department kübok unit balala nem senotsü teyaria agüja liasü.

Kasa mapang department ajanga Nagaland Police Department kübok unit ajak nem "Clinical Management Protocol: COVID-19" nungja agütsür kaket tilaka lemtsütsü molungtet, kong COVID-19 tashidak dak sendakba mera aser lenmang balala shia lir.

Iba sentong nung AIGP (Adm), Aaron Patton, NPS menden liasü aser paisa tepela ankep o jembi. Sentong tenzüka IPS IGP (Hqr), Kohima, S. Tokiumong Yimchunger ajanga metetpela mapang agia liasü.

ATMA Jakhama Block nung maparen balala inyak

Dimapur, Chiteni/July 30 (TYO): State nung tzüinglu kanga ajema aruba mapang aluyimertem yaritsü nükjidong nung DAO, Kohima ATMA Jakhama Block lenisüba kübok DAO field staff aser officer temi Mima Village nung July 21, 2021 nü 'SRI Nursery Bed preparation and Drought Mitigation through Direct Seeded Rice (DSR) method using Api-seeder' onük nung ajemdaker field demonstration agia liasü.

Tsünüsempongtsü tila raksar aliba anogo ter lir tzü shidak mesüoka renemer melentsü atema SRI nurseries tem renema liasü.

July 24, 2021 nü ATMA Jakhama team ajanga Kezoma Village nung jenjang (millets) bendentsü asoshi Farmer's Field

Day ka agia liasü. Lisopuri akhi mapang nungi millets tsünüa amshiba yimya tanemi sama aoba nungi kumzüka ayutsü mechi iba sentong ya ayongzüka liasü.

Iba sentong mapang aluyimer temi ashiba agi, anasa aliba yimtsüngtem nem akhi yimya mesamadaksütsü mechi iba fox tail millets indang metsüjang tabu balala agütsütsü nükjidong nung iba sentong ya agi.

Iba sülen aluyimer den ATMA staff temi millets aruba nung shilem agia liasü. Iba sentong nung Angela Rokoshuno Zao, DPD ATMA Kohima, ATMA Jakhama Block aser aluyimer 24 dena liasü.

Ano July 28, 2021 nü Viswema Village nung ATMA Jakhama ajanga Agri-Dairy Farm

School ka lapokja liasü aser Notho Angamai ya Farm School Teacher ama inyaktsü shimtet.

Iba sentong nung BTM Jakhama Block ajanga aluyimer dang farm school nükjidong, farm school teacher indang mapa aser teinyaktsütem rateta shia liasü. Iba sentong nung Farm School Teacher tasenbaia par lu nung ajangshiba timtem aser temoatsütem lemsatepa liasü.

ATMAJakhama Block ajangasa July 29, 2021 nü SRI Farm School Kigwema Village nung Cono-weeder amshiyim indang field demonstration sayua liasü aser iba mapang parnoki aluyimer dang Cono-weeder amshia alu nung ai atsütsü indang yimyatem sayua liasü. Cono-weeder ya DAO, Kohima ajanga lema liasü.

NIC office tesem taseni belenogo

Dimapur, Chiteni/July 30 (TYO): Nagaland Information Commission (NIC) ajanga July 26, 2021 nü sangdong ka nung ashiba agi, NIC, Nagaland, Kohima indang office ya tesem tasen kati belenogo aser nungdakba osangtsüsang ajunga tsüinglanglen agüja aliba address nungi tongteprateptsü akok:

Nagaland Information Commission Agri-Farm Colony, Ward No. 17, Lane-6, H/No. AFC-578, Post Box No. 148 Nagaland: Kohima-797001
E m a i l : c i c . n a g a l a n d @ g m a i l . c o m
W e b s i t e : www.nlsic.nagaland.gov.in

NIP indang Parliamentary Committee senden August 2 nü amentsü

Kohima, Chiteni/July 30 (TYO): Parliamentary Committee on Naga Political Issue pur senden August 3 nü amentsü renema aliba August 2 nikongdang 2:00 ako nungi State Banquet Hall, Chief Minister's Residential Complex nung amentsü, ta sangdong ka ajanga metetdaksüogo.

Sangdong ka nung iba osang metetdaksüba mapang Committee indang member secretary aser minister Neiba Kronu-i 13th Nagaland Legislative Assembly indang züingsem ajak aser MP anaprong senden nung arua adentsü mepishia metetdaksüogo.



Dimapur kübok Supermarket anasa aliba Bamboo Bazaar Restaurant mitsü kuma rongdoker aliba noksa nung angur. Tanep 2:30 ako meta lendong atalok aser short circuit ajanga miji adok ta iba tesem nung alir kati ashi. Kitsükkirong lendong ajanga kibong ana talidak mali kümogo aser rice hotel ka, restaurant ka aser dokan 8 shi rongdokba nung Rs 30 lakh shi akoksaogo ajisüaka nisung yiruyibongba mesüra taküm samaba kecha maliasü. (Dimapur, July 30)

NPSC ajanga metetdaksür

Dimapur, Chiteni/July 30 (TYO): Nagaland Public Service Commission ajanga 13.11.2019 nung advertisement ka sangdonga ano 27.01.21 nunga metongshir sangdongba dak sendakba nung ajemdaker tsüinglanglen agüja aliba osang ya sangoktsü:

1. Common Educational Services Examination, 2019 atema written examination ya 14th August, 2021 sülen agitsü
2. Temsüa aliba Candidate temi Admission Certificate (routine aser teinyaktsü amala tejangja shia aliba) ya August 9, 2021 nü nungi tenzüka www.npsc.nagaland.gov.in nung Examination Application Case Number agütsüba sülen

download sütettsü. Admission Certificate maliba Candidates shinga written examination nung amentsü memelatsü.

3. Magizükba candidate tem tenüng aser parnok magizükba kuli ya Commission indang notice board nung sayutsü aser ano Commission indang w e b s i t e www.npsc.nagaland.gov.in nunga 02.08.2021 nikongdang nungi reprangtetsü.

4. Teyari nungdakba Candidate temi NPSC helpdesk number +918259977429 nung 09.08.2021 nü nungi tenzüka mapa inyakba anogotem nung anepdang 10:00 ako nungi nikongdang 3:00 ako tashinung jembitsü akok.



Akhoya lushi nung taküm 2021 küm nungi Mission Organic Value Chain Development sentong kübok organic somomo lu ayimtsü tenzüko. Iba aluyimba sentong takok ngua inyaktsü asoshi tanü Hokolbar nü Akhoya nung Mokokchung nungi Horticulture officers aser Kohima nungi Entrepreneurs Association purtem arua aluyimtsü aser Farmers' Producer Company tentettsü asoshi shisalemsatepba mapang ka agiogo. Iba sülen aluyimertem den noksa agiba ka yangi angur. (Akhoya, July 30, 2021).

Meghalaya-i Invest India den MoU sign sütepogo



Guwahati, July 30, 2021 (Agencies): Hokolbarnü Meghalaya State Investment Promotion Society (MSIP)-i Invest India, Union Ministry of Commerce and Industry den MoU ka nung sign süogi. "State nung shishilembabaren aser industry tem renlokdaktsütsü atema iba MoU sign süteper" ta Meghalaya chief minister Conrad K. Sangma-i New Delhi nung MoU sign asüba

sülen ashi. "Alizüngtemji tang atema aser mapang talangka atema ayutsü. Iba ajanga Meghalaya nung entrepreneurial system ajungkettsü aser One Product-One District Programme tajungba akümtsü" ta paisa ashi. CM Sangma-isa kidanger linüktem den shishilembaba tesentaktep akangshitsü aser ajungkettsü atema jembi. "Invest India teloki Global

Value Chain pusemtsü. Lakadong Turmeric, Eri Silk, Mushroom, Pineapple aser Jackfruit amala den tanga Startups ajungkettsü" ta paisa metetdaktsü. "Northeast nung Lakadong turmeric aser Ri-Bhoi District nung jiro aser ninang mojitzü amala shishilembaba ajanga mapa tenzükogo" ta Managing Director & CEO, Invest India D Bagla-ia ashi.

Mizoram-i Tripura nungi nungdaktem beneler

Aizawl, July 30, 2021 (Agencies): Assam-i NH 306 nung 'economic blockade' asüba yong Mizoram state sorkari tanga state tem nungi khu bener arutsü tenzükogo aser Hokolbarnü totzü abenba garitem Mamit district tongogo. NH 306 ya Mizoram atema tongtipang lenmang lir kechiyong iba lenmang ajanga Assam adena linük den sendakteper. Mizoram sorkari Tripura nung Food Corporation of India (FCI) den janga abentsü atema jembitepogo ta osang angazüker. "Mizoram nung ita asem shi chiyungsü atema jang peria dang lir" ta Food, Civil Supplies & Consumer Affairs Minister K Lalrinliana-i ashi. Onoki LPG aser totzütem

abentsü atema Manipur sorkari teyari meshitsü, ta paisa metetdaktsü. "Assam-i rongsenketzung tenokdangba agüja liaka Mizoram nung tanga nungdakba ajak peria dang lir. Nübertemi timtem majurutsü atema state sorkari akokba tashi mapa inyaker" ta Minister Lalrinliana-isa ashi. Mizoram sorkari Bodbarnü Ministry of Home Affairs (MHA) dang Assam-i rongsenketzung tenokdangba agüja aliba agientsü atema ayongzüka liasü. Assam sorkari Bodbarnü par sensotem dang Mizoram-i maotsü aser Mizoram nung aliba Assamese nunger dang kümdanga alitsü osang metetdakja liasü. Mizoram nung 'non-

residents' senzusenbongba noktanga mali: Mizoram kübok Kolasib district administration-i state nung non-residents senzusenbongba noktanga mali ta metetdaktsüogo. "Mizoram nung Non-Resident tem Kolasib district ajanga senzüba atema tenokdangba kecha agüja mali" ta Kolasib deputy commissioner Dr H Lalthangliana-i ashi. "Mizoram-Assam arrtsü indang tebilemtsü dak sendakba nung Mizo nungeri Kolasib district nung non-locals nem timtem magütsütsüla" ta paisa metetdaktsüogo. Kolasib DC-isa district nung non-local temi ajuruba khuret reprangshimtsü atema ketdangsür asem mapa lemezüktsüogo.

Assam BJP sorkar kübok arrtsü mangatettep tuluba kümogo: Meghalaya MP Vincent Pala

Guwahati, July 30, 2021 (Agencies): Assam nung BJP-i aniba sorkar akümba sülen nungi Northeast state tem den arrtsü mangatettep ken o tem tuluba kümogo, ta Meghalaya nungi Shillong constituency Lok Sabha MP Vincent Pala-i ashi. Hokolbarnü Vincent Pala-i Prime Minister Narendra Modi dangi iba atema shidi ka zülü. "Assam nung tang aliba BJP sorkari dang iba kuli meteta lir. Assam-i state balala den ken o tem adokba dang masü saka

tashiyim mapa inyaker" ta Pala-i Modi dang ashi. Prime Minister Narendra Modi-i tiyongsü aiter state tem tsüngda arrtsü ken o tem angatetteptsü ayongzüker, ta Shillong MP-isa ashi. Assam-Mizoram arrtsülen raratepba ajanga Northeast nung yimjung tensa tamajungba akümtsü sayuogo. Tripura aser Manipur dak alaka tanungba Northeast state temi Assam den arrtsü ken o tem adoka lir, ta Vincent Pala-isa ashi.

Assam Congress MLA Borgohain-i party toktsüogo; BJP nung adentsü

Guwahati, July 30, 2021 (Agencies): Assam nung kümsük anaben tashi Congress MLA Sushanta Borgohain-i party nungi anenogo aser Bharatiya Janata Party (BJP) nung adentsü. Borgohain ya Thowra constituency nungi MLA lir aser pai August 2 nü Guwahati nung BJP nung adentsü. Iba sentong nung Assam chief minister Himanta Biswa Sarma aser BJP state president Bhabesh Kalita nati shilem agitsü. Borgohain-isa Assam Legislative Assembly nungi anentsü aser Honibarnü Assam Assembly Speaker Biswajit Daimary nem shidi agütsütsü. Party sasep nung

mepetmesü adokba aliba ajanga iba telemtetba agir ta Thowra MLA Borgohain-i Assam Congress president Bhupen Borah dang shidi nung ashi. "Assam Congress tajung kümdaktsütsü atema meranga inyakba mapa ajak nung tamakok nguogo aser iba jagi ni party toktsütsüsa akümer" paisa ashi. Himanta Biswa Sarma-i aniba BJP sorkar akümba sülen Assam Congress MLA anati party toktsüogo. Taoba ita Mariani nungi kümsük pezüben MLA inyaker Rupjyoti Kurmi-ia Congress toktsür BJP nung aden aser tanü Sushanta Borgohain-i pa sülen anidakogo.

Opposition MLA aikati BJP nung adentsü: Himanta Biswa Sarma



Kokrajhar, July 30, 2021 (Agencies): Assam nung opposition MLA aikati Bharatiya Janata Party (BJP) nung adentsü aser BJP-i Bodoland People's Front (BPF) den mangatettep kecha mali ta chief minister Himanta Biswa Sarma-i tanü metetdaktsüogo. "World Day Against Trafficking In Persons" tenung nung Hokolbarnü CM Sarma-i Kokrajhar semdang. Hopta ka tejakdang Chirang Police-i Sikkim nung tanur 40 shibelena anir aoba kümzüka liasü aser tanü Sarma-i item tanur tsüraburtem den ajuruteptsü atema ao. "MLA tem anenba sülen ita trok tsüngda by-election agir. Sushanta Borgohain-i August 2 nü BJP nung adentsü. Ano MLA ana-asep kati BJP nung adentsü akok" ta pai osangbener

den jembidang ashi. BJP lennir Ranjeet Dass-i yashi menden 6 shi ka atema by-election agitsü akok ta osang metetdakja liasü. "BPF ya onok tsükchir masü, saka election magidang parnoki Grand-alliance nung aden. Iba sülen nungi onoki parnok den yimten onük kecha mejembi lir saka Bodoland nung yimjung alitsü atema onoki mapa ajak inyaktsü molunga lir" ta CM Sarma-isa metetdaktsü. Assembly Election adokba sülen BPF aser Congress tsüngda tesentaktep mejungi küma lir. BPF lennir aikati grand alliance nung madenba aser BJP den tesentaktep yangluba olentem metetdaktsüogo. Ajisüaka, BPF tanishir Hagrama Mahilary-i iba atema osang kecha mesangoktsü lir.

**GOVERNMENT OF NAGALAND
DIRETORATE OF TECHNICAL EDUCATION
NAGALAND: KOHIMA
NOTIFICATION**

This is to inform the interested candidate to collect the prescribed application forms for selection to B. Tech. degree courses under School of Engineering & Technology (Nagaland University), Dimapur from the Directorate of Technical Education, Kohima (Below New Secretariat Complex) on payment of Rs. 200/- (Rupees two hundred) only per set w.e.f. **31st July, 2021 to 10th August, 2021** during office working hours.

The form may be downloaded from the website www.dtenagaland.org.in and the fee of Rs. 200/- (two hundred) only may be paid while submitting the form. The form may be downloaded and printed in A4 white paper.

Last date for receiving complete forms by hand is **10th August, 2021**. Students who have appeared and are waiting for 10+2 result are also eligible to apply. However their selection will be subject to obtaining the requisite percentage of marks prescribed for the courses.

Sl. No.	Branch	No. of seats	Eligibility	College/ Institute
1	Agricultural Engineering & Technology	06	Passed 10+2 with PCM/PCMB 45% marks for SC/ST candidates	School of Engineering & Technology, Dimapur
2	Information Technology	06	-do-	-do-
3	Computer Science & Engineering	06	-do-	-do-
4	Electronics & Communication Engineering	06	-do-	-do-
5	Biotechnology	06	Passed 10+2 with PCMB/ 45% marks for SC/ST candidates	-do-

**Sd/-
(Nungsangmenla Imchen)
Ex-Officio Director**

Issued by DIPR



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI (JULY) 31, 2021

Opposition Ola Mesongtemtsüla

- Tangsen Lemtur

Israel nunger NSO Group indang Pegasus spyware ka amshia India nung osangbenertem, opposition lenirtem aser tongtibang nisungtem jembishinü ajak itdangitba ken o nung ajemdaker tang opposition lenirtemi Indian Parliament nung iba onük nung o lemteptsü tekong meranga akhangba ajanga anogo aika senden junga magiteti arudar. Ajisüaka sorkaribo Pegasus ken o ya tongtibang onük ka masü, ta shia opposition ola songtemtsütsü meranger. NSO Group-i ashiba agi, Pegasus ya kiralongrartem aser linük anemertem anema amshitsü atema parnoki sorkartem dang ang ayoker ta shiogo, anungji Pegasus ya opposition lenirtem aser osangbenertem densema tongtibang sensotem anema amshiba kuli tejangja ngura sorkar kanga aitsü. Ano külen India sorkari parnoki Pegasus mamshi, ta shira Pakistan aser China ama tsükchir linük kari India anema amshir asütsüa akok, ta rajemer aser ibajibo linük security atema lendong. Anungji opposition-i akhangba ama sorkari Parliament nung iba onük jembitsü melungtsüla aser iba ken o bushisungdangtsü tuyutsüla. Parliament ya linük atema tongtibang onüktem nung o lemteptsü atema tongti sabang ka lir, ajisüaka democracy linük ka nung sorkari opposition ola nembangtsütsü merangra ibajibo maaksü. India ama oshi-open, sobaliba aser tamangba yimsü balala temeyoktep aika aliba linük ka nung lokti lenirtem, meimchir temeden atema inyakertem, osangbenertem aser opposition lenirtem ajak dak tebilemba/tangatetba balala lir, aser pei tebilemba lemsateptsü atema linük temzüng nung temeden agüja lir, ajisüaka senso aikati iba temeden amshitsü arendaker aser sorkar aija jembirtem dangbo 'linük anemertem' ta ajar. Tang ama mapang ka nung India nunger puti otsü meyipa repringshitsü nungdak, kechiyong British nunger yimsüsüba nungi India nunger nüchiso anguba sülen lenirtemi linük arangshia tajungba akümtsü atema pei tebilemba sademsadema jembitsü senso ajak nem temeden agütsü. Senso tajung kati pei kija ajangzüktsü atema masü saka ajak ajangzüktsü atema melung masüba ola adoka pei tebilemba lemsateper. Akhidang USA nung aser South Africa nung sorkar anema nokdakba (anti-apartheid movement) mapang nunga lenirtemi Mahatma Gandhi tangatetba nung ajemdaker ola adoka inyakba asenoki puti otsü nung azünger. Ajisüaka tanü India nung sorkar inyakyim meshidakba anema ola adokertem ola nembangtsütsü meranger. Meimchir dak melung masüba mesüra tangatetba balala aliba ya ajak dak aketba yimya ka lir. Temang ka küma menateper asoba jakrep dak-a shisatsü aser tangatetba balala lir. Kibong ka nunga tsürabur tsüngda mesüra tsürabur o tanur na tsüngda tangatetba balala lir, ajisüaka pei tebilemba dang shidak, ta tekong merangba kibong nung kodanga tesünep malir, saka kati ka tangatetba akhümtsübutepba kibong nungbo tesünep aser terenlok alir. Parliament nung opposition-i ola madokra sorkari pei sünütsü asütsü, anungji sorkar nem pei sünütsü mesüdaktsütsü atema opposition-i ola adoktsü nungdaker. India nunger temzüng kübok Parliament aser State Assemblies nung opposition teinyaktsü shilem indang junga shia lir. Parliament nung sorkari benokba bill ajak nung o lemtepa mesüra o toktepba jembir ang mapa küma inyaktsü atema bill agizüker aser tongtibang onük ajak benoka o lemteptsü nungdaker, anungji Parliament nung Pegasus ama kanga tongtibang onük ya tama jembitsü atema opposition-i maneni tekong meranga nokdaktsüla.

OLEMSABANG

Ao Lima Yimtsüng Arogo nung Pastor

Maong Jamir

Pastor kibong akümtsüla, kibong külemi alitsüla

Yimtsüng Arogo ka nung kanga dang bendanga agütsüba aser sempet akaba lanur Pastor ka liasü. Pastor kija ali majung ta Arogoi kibong akümtsü asoshi Pastorbaji kangasa ajungshi. Küm ishika lir tanga yimtsüng Arogo ka nung inyakba aliba tetsür tajung ka pai agi. Arogo temzüng nung Pastor aser kinungtsü külemi alitsüla ta ali nung; kinungtsüji la mapa toktsür arua kinungpu den ali. Kinungtsüji tekolok tajung, degree tajung akaba, sempet akaba tetsür ka liasü, saka arogo ozüng ajanga la mapa toktsütsüsa aküm. Lar arogoi la nübu meyoknüseta sodi agütsü. Kodang la tebur arogoi aru, la mapa maka aküm. Arogoi apuani külemi liang ta asüba dak alaka, la asoshi mapa magütsü. Tanga lima nung Co-Pastor ama laa amshi nungbo koda jungla ta temeteter karibo shidang saka arogopuri mangatet aser mapa küma meinyaktet. Ita sen magi lai teubaba yaria tenati külemi iba Arogo nung amangbapur ajak temulung süa jangratema inyak.

Tanur schooli aotsü tenzükba

Küm ishika lir tena nem tanur tebur tajung ka moatsü. Iba jabaso küm 4 ajungdangbo Schooli yoktsü asoshi tena kanga shisabulua liasü. Tanur kong züngdaktsütsü? Boarding school tajung ka kong Pastor aser toklang tenzükter chirtem ajak sadok sadoka züngtettsüsa, Impur mesüra tapet jaka ka nung ali nungbo koda jungla ta tena jembir kechiaser iba khuretji yimtsüng nung tenzükter ajaki ajurur. Tenati par jabaso tangar meneba education tajung ngudaktsünü. Saka yimtsüng nung school tajung mali aser tanga town ka nung züngdaktsütsü asoshi tashi agi mokoki liasü. Pastorba aser kinungtsü asoshi shisabulu tulutibaji tanur education and rongsen kong nungi angutsü ta asüba liasü.

Tanur education asoshi kinungtsü yimtsüng doktsür aoba

Arogo temzüng nung külemi alitsü ta liaka; Pastor aser kinungtsü talangka lemteper, tanur tajung kümdaktsütsü mechi, kinungtsü aser jabaso town ka nung oa lidaktsütsü asoshi lemteper. Ibaji dang masü, Pastor itasen tila asünung tanur fee aser tanga nungdaktem meperitsüet; anungji kinungtsüi kinungpu itasen den sema shishilemba mapa tila ka inyakba tanur züngdaktsü. Shishilemba mapa tila kaji tangar ashiokeja inyakba mapa ka masü, saka kanga dang ochi shia aser meranga inyakba shishilemba mapa ka liasü. Iba tajangzük ajanga ki para peria aru. Saka theology zünger, pastorba kinungtsüi business inyaker na ta tilua jembitsü.

Pastorba arogo doktsütsüsa akümba

Küm ishika lir Arogo nüburtem nemnemtsü tenzük; Pastor aiben yimtak malir, aser kinungtsüa tanur sodi mapang nungbo arutsüba sür nung marur, business nunga temulung tali agütsü; pastor kibong külemisa ali tajungba; Pastor kinungtsüi shishilemba mapa inyakba ya tai; aser ali rongsen kanga arishir ta tilua jembitsü. Mapang shia meeting nung Arogo tenzükertem Pastorba dang o tamajung odia ashi; ibaji dang masü nüburtemi yamaisa jembir: "Tsüngrem tenzükterji timtema alitsü asoshi jatet saka Pastori ibaji mangateter". Saka ita sen tila asü nung Pastorba kibong kanga timtema liasü. Pastorbar kibong balala aliba ajanga timtem, rongsen agi timtemba ngua, tesayur kati Mizoram nung kinungtsü aser kinungbo külem alitsü ozüng lir, anungji kinungtsüji mapa meinyakra Rs. 15,000 wife allowance ta sür agütsür. Ibalaji arogoi awashi asür masür ta asüngdang nung, ajibo pongmang amai ta langzü. Children education allowance lir mali ta asüngdang nung ajibo anüngdang pongmang amai ta menütepa jembitep.

Pastorba aiben nüburtem dang par kibong timtem angateta ashitsü asoshi merang, saka nüburtemi pa dang aitsüa liasü. Anungji tanur tangar menepa shisaliok tajung ngudaktsünü yong, tanur aser kinungtsü yimdaki arudaktsütsü melena, pa mapa nungi anentsü asoshi lemteper. Yamaji, temulung shirangseta ni kechi inyaktsü, koma kibong liyonga aotsü ta terata tulu nung Pastorba pa mapa toktsür iba town arua ali. Saka Pastori pa tajaba aser mapa tejangja angateta liasü; anungji iba town nung Arogo tenzükba wadang nungsa mesüaka, pa dak sempet tajung ajiteta Khristar wadang ka nung mapa angu. Pa kinungtsü tena mangdang ama tanubusangji shisaliok tajung ngua tulu ka aküm. Tanü Nagaland Government nung ochi shia tenzükter rongnung ka lir.

Yimtsüng arogo nung tebilemstü

Pai toktsür arua Arogo nung iba sülen Pastortem shingia küm talanglang meinyaktet. Kechiba süra pa ama Pastortem ajak tanur shisaluyim angutsü mapang nungbo tetsükdaktsü alua, Arogosa toktsür ao.

Iba Arogo nung talanglang melitetba kuli:

- * Yimtsüng nung aser yimtsüng anasa School tajung mali;
- * Ita sen ajemra nungji Pastori par jala jabaso education tajung ngudaktsütsü Hostel ka nung meyetet;
- * Yimtsüng toklang tenzükter chirtem arua züngtettsüsa boarding school tajung asen lima mali;
- * Tsüngrem tenzükterji timtema dang alitsüla ta tangatetba ka lir;
- * Shishilemba mapa ya temenen mapa ka amai repringer aser angateter;
- * Arogoi servicebo aginer saka facilitybo agütsütsü kanga nungnanger;
- * Unemployment indangbo jembir, saka yimtsüng nung Pastor inyaker mali.

Asen Ao Arogotem; talisa yimtsüng Arogotem Pastor aser toklang tenzükter kibongtem asoshi shishia bilemdangtsüla. Iba jenjang nung dang lira, kenü anogo yimtsüng Arogotem nung Pastor inyaknür malitsü. Iba ya tajaba mangatet ta masü, mesüra jenjang tajungba aser sadoka alitsü asoshi bushiteper ta masü; saka tanü tetoktepba lima pei jala jabasotem tarutsü asoshi shisadandang towntem bushitsüsa akümer. Tsüngrem tenzükter chir ka ama tanur junga anitetsü aser alima senso tajung a küma anitetsüba aser ochi shia tenzükdaktsütsübaji tsürabur ajak khuret.

Tenzükter sodi meshiangni ta nüburi yonga ataba

Arogoi pastor/toklang tenzükter ajak touchia yutsür ta mangatetsüla. Arogo aikati tenzükter lemang balala nung yaria arudagi - gari, ki angati, jang, telephone, newspaper, shirangdang awashi, yamala mapa tajung aika inyakba lir. Hau, tenzükter karbo responsibility, commitment mali, lesson junga merenemba, züpa züpa tenzükba tenzükter aika lir. Rongsen nung temulung agütsüba tenzükter, tangar majung dang jembitsüba, pei tai hau ta magizüktetba, tangari ashiba magizüktetba tekong temerang tenzükter aika lir. Ajak den saku, nüburtemi meimtsüsa litet nungbo teyari balala angutsü lemang aika lir sür jakla majungba agi kodangang sodi meshitsüaji ta nüburi yongya ataba aser timtemer ta ajiteta arogoi odang doktsüba, kiyonger odang doktsüba aika ajangshia aruogo. Tenzükter ia nüburi meimtsüsa ni tenzükdar ma ta shisadandangtsüla.

Lungjemer inyakra iba tebilemstü koktet

Saka yangi tongtibang ka shinübaji, tanur education ya lir. Yimtsüng nung alirtem chirtem aser arogo nung tenzükter chirtem asoshi khuret tulutibaji koda sür tanurtem shisa riju tajung nung tangar menepa züngdaktsütsü ta asüba ya lir. Dimapur, Kohima aser Mokokchung nung alir tenzükter chirtem asoshi tebilemstü mali. Putu ka nung arogotem English school yimtsüngtem nung lapoktsü merangdangogo, saka tamakok alua aika shibanga ogo. Jurila yimtsüng arogo kati boarding school tajung ka, kong toklang tenzükter chirtem teyari agüja züngdaktsütsüsa lapoktsübaji tamakoktsü, saka arogotem lungjemerbo akoktsü. Yim ishika lungjemer yamai inyakdi ta tangatetbai anünga liradi. Lungjemer noktaksi ta süra, foreign lima, India lima balala nungi arua züngtettsüsa Ao arogotem inyaktettsüba tashi lir. Mungdangia koka lir. Iba mangdang asoshi ajaki sarasademdi. Iba mangdang dakji alaka akok nungbo toklang tenzükertem asoshi pa/la itasen dak alaka, jala jabasotem kaketshisatsü asoshi teyari agütsütsüla. Zünger alir kinungtsü mesüra kinungbo mapa doktsür külemi alitsüsa kümra "Co-Pastor" ama shim nung ajungtsü. Yamaji mesüra spouse allowance agütsütsü junger ta ajiteter. Aroka shisadangi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Assam Police-i Khristan sayutsüngir, Ranjan Chutia puogo



Dibrugarh district, Assam nung Khristan missionary, Ranjan Chutia-i sayutsüngidang tangokba noksa nung angur.

Chiteni/July 30, 2021: Assam state kübok Dibrugarh district nung Khristan missionary, Ranjan Chutia-i Hindu nunger kangshia Khristan yimsü dangi meypdaksür, ta police-i pa nem tai tonglokja Brihostibarnü (July 29) puogo.

Osang angazükba agi, Moran nung Dibrugarh police-i sayutsüngir, Ranjan Chutia pa indang healing centre nung lia pa apu. Hindu Yuba Chatra Parishad-i Moran police station nung FIR ka agütsüba nung ajemdaker pa apu.

Parnoki ashiba agi, Ranjan Chutia-i Khristan yimsü dangi meypdaksütsü atema Srimanta Sankardev tim mesüi amshi aser Khristan yimsü proktsü atema Assam nunger yimsü kentem-Borgeet, Naam aser Ghusha

yanglushi. Khristan missionary-i item ken nung kenjang melenshia Yisu Khrista tenüng inoksem.

Osang angazükba agi, Ranjan Chutia densema sayutsüngirtemi "World Healing Prayer Center" ta ser prayer home ka lapok aser Yisu Khrista tashi ajanga shirangertem taneptsü angur, ta shia shirangertem Khristan yimsü dangi meypdaksütsü atema mesüzük. Iba Prayer home nung Chutia-i tai maket Hindu nunger meyrjang aika Khristan yimsü dangi meypdaksüogo, ta pa nem tai tongloksü.

Lokti tentet balalai ashiba agi, missionary Ranjan Chutia-i chiyungtsü den senotsü teyari agütsütsü, ta nangzüka nisung meyrjang aika Khristan yimsü dangi meypdaksüogo.

Hindu Yuba Chatra Parishad nung Secretary-General, Babul Bora-i state sorkar dang tiyongtsüi aita inyang aser missionary temi nisung aika Khristan yimsü dangi meypdaksüba mapa nokdangang, ta takhangba agütsü.

Ano külen Srimanta Sankardev asoba tesem-Batadrava Sattrra nunga missionary tem dang tai maket nisungtem Khristan yimsü dangi meypdaksüba anenang, ta tekümdangtsü metetdaksü.

Dibrugarh police-i Ranjan Chutia apuba sülen IPC kübok Arrla 153(A) aser 195(A) nung ajemdaker pa anema ken o benok aser pa medical check up asüba mapang nung pa dak coronavirus tashidak-a putetogo.

Khristan mongdang ka nung adenba atema China nunger 5 apu

Washington D.C, Chiteni/ July 30 (Agencies): July 28, 2021, Bodhbarnü China nung Shanxi Province kübok Taiyuan nung house church ka nung züngsem Khristan pongu puogo; yaküm Malaysia nung Khristan mongdang ka nung adenba atema parnok apu, ta International Christian Concern (ICC)-i metetdaksü.

Xuncheng Reformed Church nung sayutsüngir, An Yankui-i, July 13, 2021 nü China ketdangsertemi Fenyang city nung par Arogo züngsem, Zhang Ligong apuba sülen anogo 15 lir chiokogo, ta metetdaksü. Pa anizüktsü atema Arogo nung inyaker ana ao saka ketdangsertemi tenata apu, ta paisa metetdaksü.

Police-isa Khristan asem parnok kidang lia apu. Yaküm Khristan pongupronglaji Malaysia-i oa "KL2020 Gospel & Culture" Christian mongdang nung dena liasü. Iba mongdang ya Chinese Indonesian pastor, Stephen Tong-i ayongzükba liasü.

Yaküm January 28 nungi

January 31 tashi ayongzükba mongdang nung tongti o jembirtemji Pastor Tim Keller aser Pastor D.A. Carson na liasü aser iba mongdang nung nisung meyrjang aika aden. China nung parnoki temelaba meshia Malaysia-i ao aser meypa aru, ajisüaka küm ka dak tema lir tang parnok puogo.

Sayutsüngir, An Yankui-i Facebook post ka ajanga Khristantem dang China ketdangsertemi apuba Khristan pongu atema sarasademjang, ta mepishia metetdaksü.

"Tsüngremi Pa chirtem kodanga tesendokma aser maneni Arogoi Kangki apudang Arogo dang taochi sayuangma," ta An-i metetdaksü.

Parnok ponguprongla tang tepuokdak lir, aser kodang ang chioktsüar memetet.

Tawa China nung Communist sorkari Xuncheng Arogo anema maneni inyaker aser amokmerener. Ketdangsertemi yaküm November ita nunga sayutsüngir aika den Arogo züngsemtem aika pua liasü.

May 17, 2021 nü ketdangsertemi Arogo nung züngsem, Zhao Weikai apu saka anogo 15 sülen chiok. Iba sülen July 17 nü pa tanaben apu. Pa ket nung kiralongra ajungkettsüba osettem liasü, ta tai tongloksüogo aser pa küm 3 tashi tepuokdak ayutsüa akok.

International Christian Concern Regional Manager for Southeast Asia, Gina Goh-i, "2018 küm February ita nung Religious Affairs ozüngtem yanglushiba sülen China sorkari yimsü dak sendakba mapatem nokdangtsü atema ozüng tasen aika bendenlokogo. China nunger Khristantem aser bendanglen aliba

Khristantem shisalemsatepba anema China-i inyaker. Ibayongji parnoki bendangertem nem China nung aliba Khristantem manishidaktsütsü atema Khristantem nem temerenshi agütsür. China sorkari sensotem tamangba yimsü temeden nokdangtsü atema ozüng aiben yanglushir," ta metetdaksü.

ANO GO ABEN TSÜNGREM DEN

Balaka Süang

Saka Danieli pei mulung chubar chiyongtsü tajung mesüra pai yi ajemba agi pa sasa memenentsü ta mulungtet. Daniel 1:8.

Tsüngremi shibai na aja aser Pa Tanela agi süngdaksü, pai na ajanga mapa tulu inyaksü akok ta nai amanger asü? Tsüngremi na ajaba aser mapang aser na alidak tetsüngdaji nai atongtepdangogo ma? Alima nung tatalokbatemi Tsüngrem aoksadaksütsü makok. Nükjitung ka asoshi na kong lir idakji pai tejangja metetta lidaktsür.

Danieli pa mapang nung tatitangbai Kibuba den tesendaktep nung timtem magütsüdaksü. Tsüngrem tsüngdang pa taküm tagizüktettsü südaktsütsü asoshi mapa ajak nung tashi angatsüla ta pai metetta liasü. Alima tashi taitba chubai agütsüba ozüng hau ta meli-i Tsüngremi pa nungi kechi aginer aji chuba ozüng den memeyoktepdaksü.

Khristantem shirnoki Tsüngrem yimli asoshi Tsüngremi parnok lenmang balaka amshitsü ta amang parnok tatishitsü agi otsü sünga lir. Esteri nüburtem kümzüktsü asoshi lendong mapang ka nung Tsüngremi Ester chubar obendang yutsü (Ester 4:14). Ejiip nung Pharao yarir tashi taitiba asütsü aser Yakob aser par kibong ayawara nungi kümzüktsü asoshi Yosef yutsü (Lipok 41:39,40).

Ne taküm kümzüktsü asoshi nai na meketa aliba mapangtem jagi na anishidaktsür asü? Mesüra nür putu nung na balaka asütsü asoshi Tsüngrem nükjitung aser tanü ne taküm asoshi Pai mulungba jungkai adoktsütsü Tsüngrem dang asüngdangang.

ICJ-i Pakistan dang yimsü temeden anema inyakba nokdangtsü tuyu

July 30, 2021: International Commission of Jurists (ICJ)-i Pakistan dang linük tesem ajungalen Khristan densema minority tem anema inyakba anentsü atema inyakang, ta tuyuogo.

July 29, 2021 nü ICJ secretary-general, Sam Zarifi-i sangdong ka ajanga, "Pakistan ketdangsertem dang tamangba yimsü temedentem anema inyakba nokdangtsü atema inyakang, ta aiben metetdakja aruogo, ajisüaka taaktsüka ketdangsertemi tamakok angur," ta metetdaksü.

ICJ-isa Pakistan nung Tsüngrem mezüngmeshiba ozüngtem nung ajemdaker minorities anema inyakba, Ahmadis nunger reshikangshiba aser linük nung Hindu, Khristan densema minorities telok nungi tetsürtem kangshia yimsü meypdaksür Muslim nunger den kibong kümdaktsüba osang metetdaksü.

"Meimchir temeden balala anema inyakba nokdangtsü atema Pakistan ketdangsertemi inyaksü mapang tongogo," ta Zarifi-i ashi.

ICJ-i Pakistan dang par linük temzüng nung Islam yimsü dak alia tanga yimsü ajak saoka

amangtsü temeden agüja aliba nenshia metetdaksü. Pakistan linük nung Tsüngrem mezüngmeshiba ozüngtem agientsüla, mesüra item ozüng tim mesüi amshiba nokdangtsüla, ta shia ICJ-i Pakistan ketdangsertem dang tasüba temerenshi agütsüba anentsü metetdaksü..

2014 küm Pakistan nung Supreme Court-i, linük nung senso ajaki pei melungba yimsü amangtsü, külemtsü aser pei yimsü proktsü atema senso ajak nem temeden agüja lir, ta nenshia metetdakja liasü.

Pakistan ya International Covenant on Civil & Political Rights nunga züngsem lir, anungji linük nung senso ajak nem yimsü temeden agüja lir, ta ICJ-i metetdaksü.

ICJ-isa Pakistan ketdangsertem dang Ahmadis aser Muslim nunger masüba nisungtem anema benokba ozüngtem agientsü, kangshia yimsü meypdaksüba nokdangtsü aser minority nungi tetsürtem Islam yimsü dangi meypdaksür Muslim nunger den kibong kümdaktsüba nokdangtsü, aser item ama ken o tekaraba nung bushisüngdangtsü metetdaksü.


OLONG PAITEP # 5891

1			2			3			4
			5		6		7		
8									
			9						
	10								
								11	12
			13				14		
15						16			

- | | | | |
|---|-------|-----------------------------|-------|
| TIPILEN | | LANGTSÜNGLEN | |
| 1. Anenzükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. ___ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T ___ lu | - (3) | 6. _____ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa ___ a | - (3) | 9. Küm kasa purtem | - (5) |
| 13. Ajungbena temulungjang
tongtonglatsü atu | - (5) | 10. Tetsüng tajemtdak | - (6) |
| 15. Tejen lai nung tesayur | - (5) | 12. ___ adenshi | - (4) |
| 16. Tsüngsak-mopung | - (5) | 14. Tsünüsenbongtsü adokdak | - (3) |

OLONG PAITEP # 5890 TELANGZÜBA

- | | |
|---|--|
| TIPILEN : | LANGTSÜNGLEN : |
| 1. Kasa, 6. Rangben, 7. Mait, | 1. Khu, 2. Süjak, 3. Onük, 4. Oba, 5. Anü, |
| 9. Poktet, 11. Ati, 13. Atasa, 16. Rür, | 6. Ratet, 7. Mozü, 8. Ita, 10. Tar, |
| 17. Rajang, 20. Lanu, 24. Nüngjem, | 12. Tinu, 14. Salem, 15. Aja, 18. Anünü, |
| 25. Süra. | 19. Taju, 21. Ano, 22. Onü, 23. Kua. |



TANÜBO NAI LANGZÜANG

Q. Koba Olympic asayamung nung Cricket khen asayadanga lir ?

A. London 1908 B. Sydney 2000

C. Paris 1900 D. None

_____ (Taruba adok nung onoki langzütsü)


YASHI ADOK TELANGZÜBA : 1999

AO OSHI ANGAZÜKDAK:

TANÜ ANGAZÜKTSÜBA OJANG

Kinungbo
(n) Kidang tebu, kinungtsü den aliba nisung (husband)
* Kinungtsü tajungi kinungbo nung sanga jembir.

Kinungtsü
(n) Kidang tetsü, kinungbo den aliba tetsür (wife)
* Kinungbo tajungi kinungtsü ki mapa nung yarir.



Tir Yimyim

NAI-A YA METETTER MA?

- July 31 nü asor tongtibang nisung kar:**
- Confederate guerrilla leader William Quantrill (1837)
 - Kmart founder S.S. Kresge (1867)
 - Actor Geraldine Chaplin (1944)
 - Musician Gary Lewis (1946)
 - Australian tennis star Evonne Goolagong Cawley (1951)
 - Businessman/NBA team owner Mark Cuban (1958)
 - Actor Wesley Snipes (1962)
 - Actor Dean Cain (1966)
 - Author J.K. Rowling (1965)
 - Country singer Zac Brown (1978)
 - Actor B.J. Novak (1979)
 - Actor Charlie Carver (1988)
 - Economist Milton Friedman (1912)
 - Scientist Paul D. Boyer (1918)
 - Actor Alexis Knapp (1989)
 - Actor Rico Rodriguez (1998)
 - Actress Kiara Advani (1992)

SUDOKU # 5931 TELANGZÜBA # 5930

3			7	6				9	1	6	2	3	5	4	9	8	7	
8	7	1						2	3	8	4	3	2	9	7	5	1	6
	6		8		3		1	7	5	7	9	1	8	6	3	4	2	
	8					3			6	3	5	9	4	8	7	2	1	
4		7	1	3					7	9	1	6	2	3	8	5	4	
1			5	9			4		4	2	8	5	7	1	6	9	3	
	1		6	4		5	3		9	1	7	4	3	5	2	6	8	
9		4							3	5	4	8	6	2	1	7	9	
2	6								2	8	6	7	1	9	4	3	5	

OJANG LUTEP # 5476

OENNRGS	:	<input type="checkbox"/>
ETNJI	:	<input type="checkbox"/>
LKIAA	:	<input type="checkbox"/>
SRÜNGETMI	:	<input type="checkbox"/>
GSÜÜBTAA	:	<input type="checkbox"/>
MANSNEG	:	<input type="checkbox"/>
DNE	:	<input type="checkbox"/>
MTJIEI	:	<input type="checkbox"/>
DEMEANGTSMÜ	:	<input type="checkbox"/>
OAMKK	:	<input type="checkbox"/>

OJANG LUTEP TELANGZÜBA # 5475

TEMA TEPOR AJUNGBA DANG NUNGI TELUNGLN
TERENEMJEM MULUNGSENTSÜJI KANGA SENTIBA

TAN HOPTA ATEMA - KOMA SÜLA ?

Q. Nagaland nung Covid vaccination ya nisungtem teimba ka dak magii anen nunga koma süla ?



July 30, 2021 nü Jantar Mantar, New Delhi nung aluyimertemi aluyimba ozüing tasen asem anema longkak aitba sentong 'Kisan Sansad' nung adenba noksa nung angur.

Centre-i Parliament nung Pegasus ken o jembitsü memelunger

New Delhi, July 30 (Agencies): Hokolbarnü Centre sorkari, Pegasus spyware ya tongtibang onük ka masü, ta metetdakja Parliament nung iba onük nung o lemteptsü memelunger.

Linük balala nung media organisations 17-i Pegasus spyware amshia mobile phone itdangitba osang sangdongba sülen France aser Hungary na densema linük karibo iba ken o bushisüngdangtsü tuyuogo.

India nung tang tzungluruwa Parliament senden mendar, ajisüaka opposition party temi sorkari Parliament nung Pegasus onük nung o lemteptsü memelung tashi parnoki senden magidaktsü, ta shiogo.

Oppositon party temi Parliament nung Ato kilonser, Narendra Modi aser Union Home Minister, Amit Shah na lia iba onük nung o toktepnar, ajisüaka sorkari Pegasus onük ya tongtibang onük ka masü, ta tanü metetdaktsür.

Hokolbarnü Lok Sabha nung Parliamentary Affairs Minister, Pralhad Joshi-i, Pegasus nung mangatettep onük ya tongtibang onük ka masü saka nübur dak sendakba onüktem nungbo o lemteptsü sorkari melunga lir, ta metetdaktsü.

Joshi-isa, Pegasus onük atema opposition party temi IT minister, Ashwini Vaishnav dang asüngdangtsü akok, ta metetdaktsü.

Parliament House anaprong

nung IT Minister Vaishnav-i, Pegasus software amshia India nung phone itdangitogo ta osang prokbaji tiyazü; iba ya India nung democracy tenüing menüksütsü nükjidong nung inyakba lir, ta metetdakja liasü.

Journalists- N Ram aser Sashi Kumar nati Pegasus ken o ya judge teinyakdak mesüra anisüngzüker aliba judge ka leniba nung bushisüngdangtsü, ta takhangba agüja Supreme Court nem temepishiba ken o ka agüja lir, aser Supreme Court-i taruba hopta temepishiba ken oji angadangtsü lemteptogo.

Ram aser Kumar na atema jembitsür senior advocate, Kapil Sibal-i, Pegasus ken o ya ajanga sensotem temeden kongshir, kechiyong opposition lenirtem, osangbenertem aser court staff tema itdangitogo, ta ashi.

Pegasus spyware ajanga alima nung yimtenren lenir 600 shi, osangbener 160, meimchir temeden atema inyaker 85 aser business lenir 65 itdangitogo ta osang jungkai adokba sülen

France, Hungary aser Israel linüktemibo iba ken o bushisüngdangtsü tuyuogo.

Tawa International media-i, sorkar dang ang ayokba Israel nung spyware amshia India nung nisung 300 dak tema phone ajanga itangiter asütsüa akok; mobile phone number 300 dak tema jangaogo aser item rongnung tang teinyakdak minister ana, osangbener 40 dak tema, tongtibang opposition lenir

asem, Supreme Court judge ka, shishilembartem aser India nung activist tem aika indang phone numbers densema lir, ta metetdakja liasü.

Opposition party temi Parliament nung Pegasus onük nung o tokteptsü akhangba ajanga senden junga magiteta arudar. Opposition-i Pegasus ya linük security onük ka lir, anungji tanga onük ajak dang nungi iba onük ya kanga tongtibangba, ta shia iba onük nung o tokteptsü tekong meranga akhangar.

BJP-ibo, tang linük nung tongtibangtiba onükji coronavirus wave tasembuba nokdangtsü atema lir, ajisüaka opposition-i yazü onük ka nung ajemdaker senden nung timtem agütsür, ta aitsür.

Congress lenir, Mallikarjun Kharge leniba nung opposition party 14 nungi lenirtem senden ka mena iba onük nung o lemteptba sülen maneni parnoki kasa takhangba agütsür.

Osangbenertem den jembidang Congress lenir, Rahul Gandhi-i, Narendra Modi aser Home minister Amit Shah nati, parnoki Pegasus spyware ali asü maliar ashitsüla, ta metetdaktsü.

"Iba hadir (Pegasus) ya kiralongrartem aser linük anema nokdakertem anema dang amshitsüla. Onoki Modi aser Shah na dang ya asüngdangar-kechiba nenoki iba hadir ya India nung democratic institutions anema amshi?" ta asüngdang.



July 30, 2021 nü Kolkata nung tzunglu sashia aruba sülen gari lenmang nung tzü metsünga alidak rickshaw anir kati nisung kar rickshaw nung nungar aoba noksa nung angur.

PELABA LEMSATEPER
Asür LIMANUNGSANG (Mongchen)



ASO:
10 March 1948

ASÜ:
29 July 2021

Onoki teti meima aliba obala shirangba anogo nungi tasüba anogo tashi kija, kibong, kiyonger, arogo, yimten aser lokti balala shirnokisa sarasadem, nübo, shisatsü aser rongsen agi yaria aruogo, nenok ajak dang kanga pelaba lemsateper. Onoki nenok nisung shia dangi tsüngtong arua pelaba meshitetaka asenTsungremi nenok moajang ta ozü sarasadem.

Temeim Kinüngtsü, Chirnur aser Kinunger.



OFFICE OF THE
UNGMA SENSO TELONGJEM

KOHIMA : NAGALAND
Regd. No. H/RS-1140 Dt. 17-10-2000

TENÜNGSANG AGÜTSÜR

Ungma Senso Telongjem Kohima (USTK) ajanga asen Soyim Shisaluyimer HSLC aser HSSLC 2021 tatidang nung temaba jenjang atonger item shisaluyimer dang pelar aser tenüngsang agütsür.

1. Wb. Taliwapang Imsong aser Wt. Pangerlemla Jamir na jabaso **Sp. AOTUSHI IMSONG** HSLC tatidang nung Top 12th position (96.50%) Minister's Hill Baptist Hr. Sec. Kohima nungi angu.
2. Asür Lipokyangar Lkr aser Wt. Moalemla Jamir na jabaso **Sp. YIMTIYONG LONGKUMER** Top 7th position (91.60%) HSSLC (Arts) tatidang nung Unity Christian Hr. Sec. School Diphupar. Dimapur nungi angu.

Iba dak alaka ano Soyim Shisaluyimer rongnungi shirnokisa **Subject Topper** jenjang nguogo nenok ajak nem Ungma Senso Telongjem Kohima-i tenüngsang aser tetushi agütsür. Tarutsü nunga anosa takok tulu ngutakjangma ta sarasadema moatsür.

Sd/-
CHUBAMAYANG JAMIR
TIR, USTK

Sd/-
TEMJENSOWA JAMIR
TONGTI ZULUR, USTK

Longkumer Shempojang Kidong
Mendenti Ungma Impang

KHONANG TETUSHI AGÜTSÜR

1. **Dr. Imolemla Longkumtsür**, D/o Late Imtikumzuk Lkr & Mrs. Imkongzenla Jamitsür, Foreign Medical Graduate Examination (FMGE) takok ngutetba,
2. **Miss. Imkokla Longkumtsür**, D/o Mr. Limnukba Lkr & Mrs. Lolnila Imsongtsür, HSSLC Examination 2021 Science Stream 2nd Rank 85% marks den Governor's award ajangzüktetba.

Meranga azüngba den külemi tesayurtem aser tsüraburtem nem arok tetushi agütsür. Anunga aliba mapang Tsüngrem sentong meteta alitsü asoshi kidongi arishi den temoatsü meshizüka sarasadema atar.

Kidong tenüng nung ;

1. O.Tinu Lkr, Tatar
2. I. Tiajungba Lkr, Tatar
3. Limnukba Lkr, Tatar
4. Rongsennungba Lkr, Tatar

In the Court of
Principal District & Sessions Judge
Mokokchung : Nagaland

S/C NO. 136/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late Nungshimeren Ao has been applied by Shri. Takonungsang S/o Lt. Nungshimeren Ao R/o H.No. 454 Artang ward, Mkg. Nagaland for possession of:

Family Pension, PPO No. 142123419

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 30.8.2021 Given under the hand and seal of the court on this the 30.7.2021

Sd/-
Principal District & Sessions Judge
Mokokchung : Nagaland



Taoba mapang Pakistan indang diplomat inyaka alir ka jala arishi kum 27 tain Noor Mukadam tepsetba aser tetsurtem anema azudokshiba aija nuburtemi Karachi, Pakistan nung o balala zülua bener jajaba noksa nung angur.

Northern Afghanistan tzumetsung nung nisung 150 asu: Taliban

Kabul, Chiteni/July 30 (TYO): Afghanistan northeast tsutsu tenem agi sünga aliba Nuristan province, koba Taliban-i yimsu asur, yangji ajungbena tzumetsung adoka nisung 150 asu, ta iba telok indang odongtari Brehostibarnu ashi. Provincial sorkari Taliban dang iba tesem nung teyariteper tem arua timtem nung alirtem yaridaktsutsu mepishia liasü. Bodhbar aonung tzunglu kanga sashia aruba ajanga ajunben tzumetsung ya adok, ta Taliban odongtar Zabihullah Mujahed-i ashi.

Mujahid-i sangdong ka nung ashiba agi, par telok nungi teyariteper tem tzumetsung agi kongshia alidaki yokogo. Tzumetsung agi kongshir aliba yimtsungtem nung nuburtem yaritsü aser mürekmejuba maparen inyaktsu atema Afghan nung sen million 5 (\$62,000 shi) amshitsü Taliban-i totuyuba agütsüogo, ta pai ashi. Ajisüaka Taliban nungertem ya pari yimsu asudak ajungben lendong atalokba mapang yariteptsü asoshi koba tashi renema liar memetet. Par kubok ya yimdak-yimtsungtem timba lir. Merdesh yimtsung nung timtem agi kongshia aliba nuburtem akok tashi yaritsü atema onoki nuburtem ajungshir, aser teyari agütsüba lokti tentet balala danga yariteptsü shiogo, ta Mujahid-

Hong Kong nung security law kubok nisung mezungbuba merenshi


Hong Kong, Chiteni/July 30 (Agencies): Hong Kong nung nisung kati motorbike nung mener police officer alidaki longkak aitba yimyim zülua aliba nisan ka amer aoba mechi kum tuko tepuokdak ayutsü obendang agütsüogo. Tong Ying-kit, shiba indang nisan nung "Hong Kong talenba nungi salajang, ozü mapang temelenshi" ta zülua bena liasü, pa ya secession aser kiralongra mapa inyaktsü ajungmesoba nung aibelena liasü. Hong Kong indang mangatetep aliba national security law kubok aitsür pa ya mezungbuba alitsü. Anungji Hokulbarnü obendang ya ajanga tarutsü nung ken o tem jembishinütsü tia sayur. 2020 kum iba ozüing benokba sülen nisung 100 dak tema pua lir. Iba ozüing ya ajanga Hong Kong tashi tajemba kumdaktsür

asur activist tem merenshitsu temelaba kumdaktsür, ta iba ozüing anemertemi ashir. Saka Beijing-ibo yimti nung tensa azioktsü mechi iba ozüing ya nungdaker, ta nenshia ashir. Tong indang nisan nung o zülua aliba ya ajanga pa secession nung aitsü, aser pa inyakyim ajanga police den toktepba yong kiralongra mapa inyakba nung aitsü. Tong indang ken o anogo 15 jembiba mapang "Hong Kong talenba nungi salajang, ozü mapang temelenshi" yimyim nung tali temolung agüja liasü, koba democracy busema longkak aitba mapang kanga nungtugu liasü. Iba o zülü tetetzü ya Hong Kong-i mainland China nungi nüjiso meshiba lir, ta obendanger temi ashir, aser Tong okatsüri iba tetetzü ya aika lir, ta ashi. Saka tatem nung iba ojang

Bangladesh nung COVID den dengue tashidaka pokteta lir

Dhaka, Chiteni/July 30 (Agencies): Bangladesh nung healthcare system jangramatem lia coronavirus agi kongshia tia tamajungba kumer lia ano dengue tashidak pokteta lir. Tain ita kisung nung dang nisung 1,920 dak merila agi metepba nungi adokba tashidak puteta liasü, kong June ita nisung 272 dak iba tashidak puteta liasü. Directorate General of Health Service (DGHS) ajanga, taküm nisung 2,292 dak dengue puteta lir aser nisung asem süogo, ta ashi. Iba linük nung tang dengue tashidak puteta aliba ya shilem 70 shi Bangladesh yimtiba, Dhaka kisung nung lir, kong nisung million 17 shi alir. Dengue poktetba yagi Bangladesh indang healthcare nung khuret tali agütsür, koba coronavirus wave tesashi tasembuba agi telaodaktsür lir. Linük tesem balala nung ghonda 24 tsungta COVID-19 tashidak den sendaktepa asüba nisung 239 liasü, anungji linük nung iba tashidak agi asür ajak senteper nisung 20,255 alitsü, ta Brehostibar nikongdang

sangdonga liasü. Kasa mapang nisung tasen 15,271 dak coronavirus ya puteta tang tashinung Bangladesh nung nisung 1,226,253 dak iba tashidak puteter alitsü, ta DGHS ajanga ashi. Bangladesh nung dengue wara ya 2019 kum tamajungtiba pokteta liasü, aser iba mapang nisung 179 asü aser nisung 100,000 dak tema iba tashidak yagi menepa liasü. Taoba kum tera tazungba kuma nisung 1,405 dak iba tashidak putet aser nisung tenet süa liasü, ta DGHS data ajanga sayu. Ajisüaka taküm tensa ya tali tebenjaba akum, kechiaser COVID-19 aser dengue agi shirangba yimya ya mesükteper lir, anungji iba tashidak ya bendangtsü tasakba kumdaktsür. Aser mozüki nung yipten aser Intensive Care Units (ICUs) timba coronavirus agi shirangertemi agisepogo, anungji dengue agi kanga sashia shirangertem mozüki nung anepalutsü tasak akumer. WHO ajanga ashiba agi



Philippines-i India den Nepal, Sri Lanka, Bangladesh, Pakistan, the United Arab Emirates (UAE), Oman, Indonesia, Malaysia aser Thailand linüktem nungi nisung marudaktsütsü tenokdangba agüja aliba ano Hokulbarnü August 15 tashi atsulangshitsüogo. India nung October 2020 nung mezung jangjatetba COVID-19 Delta variant ya Philippines nunga nisung 216 dak puteta lir, aser iba tashidak azüoktsü mechi tenokdangba ya agütsür.

(Maneni tapak 10 nung...)

13buba Music Awards of Nagaland atema jaoker



Dimapur, Chiteni/July 30, 2021 (TYO): Native Trax Society-i 13buba Music Awards of Nagaland (MAN) indang nomination atema entry tem jaoker, ta sangdong ajanga metetdaksü.

Nagaland telungtet nung alir artist, recording studio, producer mesüra parnok indang 'representative' temi mejemba aser October 1, 2020 sülen sayaba original record tem agütsü asoshi jaoker.

Iba entry atema, <https://www.facebook.com/musicnagaland> website nung Music Awards of Nagaland Facebook page nungi form aser tetuyuba tem download asütsü akok.

www.facebook.com/musicnagaland website nung Music Awards of Nagaland Facebook page nungi form aser tetuyuba tem download asütsü akok.

Entry atema taa magitsü aser entry ajak email ajanga musicnagaland@gmail.com mesüra Whatsapp no. 7005251186 nung agütsü.

* Entry shia nung teküboklen agüja alibatem adentsüla:

i. Entry form nung abensa zülur sign asütsü.

- ii. Audio ken/music video (mesüra audio/ video link)
- iii. Kenjang (Lyrics) (Hindi/ local dialect nung entry tem English oshi agi meyipzükba adentsüla)
- iv. Artist/ Band profile den noksa.

Lyrics aser bio/ band profile tem text file süshia mesüra MSWord document nung ajener agütsü. Iba dak sendakba nung image files/ photos/ screenshots magizütsü.

Maneni, August 31, 2021 anogo tashi dang entry agütsü/ agizütsü. MAN award mesüra entry dak sendakba nung osang tejanga metettsü asoshi <mailto:nz@pra.co.nz> 9856201694/ 8014263251/ 7005251186 nung tongtepratepang, ta kasa sangdong nung shia lir.

Peren nung 'World Day Against Trafficking' mungogo

Peren, Chiteni/July 30, 2021 (TYO): Peren district den Beti Bachao Beti Padhao (BBBP) MSK-District Level Centre for Women (DLCW) aser Sakhi-One Stop Centre longjemer, Hokolbarnü (30.07.2021) Town Hall, Peren nung 'World Day Against Trafficking in Persons' anogomung mungogo. Iba sentong ya "Victims' Voices Lead The Way" omen nung ajemdaker agia liasü, ta sangdong ajanga metetdaksü.

BBBP indang Nodal Officer & EAC, Peren HQ, Kevethito Rose, NCS-i telok pela agizük aser iba sentong agiba indang nukjidong tem lai telok dang tongmelang agi rasa ashi. Rose-

i, South East Asia linüktem talisa India aser Bangladesh nung nisung shibelenba maparen ya shishilembaba ka ama kümogo, ta metetdaksü.

ASI, Women Police Station, Jalukie, Tingkhovei Kuki-i iba sentong omen nung ajemdaker telok den jemba liasü. Lai, nisung shibelenba maparen samatsütsü asoshi tamasa iba timtem jangjatsüla aser item tensa ajangshirtem meimtsüla, ta ashi.

Tashiyim agi mapa inyakdaksüba, kidang teyariteper ayuba, 'sex-trafficking' aser 'organs trafficking' ajanga nisung shibelenba maparen inyaktsü

lenmang lapoktsür, kong item tensa ajangshirtem taolen mali mesüra parnoki timtem ajak arema inyaktsüsa akümer, ta lai shisem.

Item timtem nungi kümzüker/jenbor tem pelaa lidaktsütsü atema, asenoki parnok kanga meima aser anepalutsüla, ta lai ashi.

District Child Protection Unit, Advocate Asungbe Hau-i "Trafficking in Peren District" onük nung jembiogo.

Maneni, iba sentong nung Sakhi- One Stop Centre indang Counsellor, Grace menden liasü. Iba sentong tembanga District Coordinator, MSK, Kiziupeululie-i tepela anküp o jembi, ta kasa sangdong nung shia lir.

Peren District Hospital ajanga metetdaksür

Peren, Chiteni/July 30, 2021 (TYO): Medical Superintendent, District Hospital, Peren, Dr K. Limatula Ao-i sangdong ka ajanga, Peren district kübok tangar memene alir/matamabensar temi ita shia mezüng Hokolbar anepdang 10:00 ako nungi nikongdang 1:00 ako tashi, District Hospital nungi

Disabilities Certificate atema tenüng agütsütsü akok, ta metetdaksü.

Anungji, Disabilities Certificate atema parnoki item document - Aadhar card, voter ID, ration card aser PAN card nungi mashi ka bener arutsü asoshi tetuyuba agütsür, ta kasa sangdong nung shia lir.

ALI TAYOKTSÜ LIR

Chang Baptsit Church anasa, Chumukedima Town.

Sq.ft Rs. 350/-
Contact : 9862273765
9856247526



Chief Veterinary Officer Longleng, Dr. A. Imsüyanger Ao-i veterinary profession nung shilem tajung agiba reprangteta konang tulu aketba "IVACON-2021 Best Field Veterinarian Award" (IVA Nagaland Chapter) anguba asoshi pa nem tenütsang aser tetushi agütsüba sentong ka Dimapur nung Nagaland Veterinarians' Association (NVA) ajanga ayongzüka agiba mapang tangokba noksa nung angur. Dr. A Imsuyanger nem iba award ya tawa Confederation of Indian Industry (CII) den yaritepa Indian Veterinary Association (IVA)-i 'Emerging Challenges to Veterinary Profession' onük nung ajemdaker International Virtual Conference akadang senpettsü.

KOTAKER MONGCHEN NUNG KÜM KA RENTETOGO



MRS.M.TAINLA LONGKUMER (AKHOYA)
31st July 2020 - 31st July 2021.

Kibuba matsügang pa temeshipur asüba senti lir.
T.Ken.116 : 15.

MRS.M.TAINLA LONGKUMER, Kibubar wadang nung ano ten meremjungi aoksaka 31st July 2020 nung Kibubai aja, aji oda alima shisabulu khuret ajak pongtoker Kibuba den Kotaker mongchen nung, kong shirang, timtem, tasüba kecha mali, teti tepeladak alir, yangji tanü na küm ka renteter.

Akhüliwa, ne temeim, yimya awashi, aser mapa tajung agi onok mulungjang nung anogo shia jemba medangoktsüdang na ali ama sünepdaksür.

Kodang Kibubai jadri, ka kenü, ka kenü, ta arutsü aser idakji Kibuba den teti tatem makai tepeladak asenok külemi alitsü, ya ozü mulungnen, teimla aser tamang sarasadem.

Temeim Kinungbo, Chirnur, Semchir aser Kinungertem.

Office of the Citizen Club Longsa Mokokchung

KONGNANG TETUSHI AGÜTSÜR



Wb. J.Rongsen Jamir



Kr. Imtjungla Jamir
Subject Topper HSSLC 2021

Tsürabpur Wb. J. Rongsen Jamir, S/o Lt. Jungshitemjen, Ministry of Culture Govt. of India ajanga Traditional Folk Song & Dance nung GURU anguba asoshi konang tetushi tulu agütsür. Tanabuba nung Kr. Imtjungla Jamir D/o Toshimanen, HSSLC tatidang nung Philosophy subject topper jenjang anguba asoshi tenütsang agütsür. Iba den külemi shirnokisa taküm HSLC aser HSSLC tatidang nung takok ngutetogo, nenok ajak nem asen Citizen Club Office ajanga tenütsang agütsür.

Sd/-
Alemnungsang Jamir
President


Sd/-
Akangtoshi Longkumer
General Secretary


SANGDONGER

Luyong Village Yimkong Sungsama lemtet
Dated 23/07/2021

Mr. Supongyanger Tzudir, (Molungyimsen) Mr. Alichimong-er chir, Luyong yimtsüng dangi Rostrum asütsü aruba nungi (2019-2020) sen Rs. 3,75,000 (Three Lakh Seventy Five Thousand) only yimer dang yazü kuli agüja auyazüka akiba puteta Temzüng nung aliba ama inyaktsü Luyong yimkong Sungsama lemtet Molungyimsen Kosasanger Putu dangi aben, saka Kosasanger Putu Molungyimsen-i Temzüng No.5 nung aliba ama meinyaktet nung Luyong yimkong Susangma 23rd July 2021 lemtet yamai sangdonger.

1. Molungyimsen Kosasanger putu lemtet Luyong-i magizüker/magir.
2. Supongyanger Tzudir dang auer da ajatsü.
3. Mr. Supongyanger Tzudir Luyong yimtsüng lokti tentet kecha nunga pa aso mamshitsü.


S. Imti Tzudir
Chairman
Luyong Village Council


Bendangwati Jamir
Secretary
Luyong Village Council

Tokyo Olympics: Lovlina semi final-i iogo



Tokyo, Chiteni/July 30, 2021: Tetsür 'welter weight' 69kg quarterfinal asaya nung India tsür Lovlina Borgohain-i Chinese Taipei tsür Nien-Chin Chen madak takok ngur sülen tangokba noksa ka yangi angur.

Tokyo, Chiteni/July 30, 2021

(Agencies): Tang asaya aliba Olympic Games nung mezüing shilem agila, Lovlina Borgohain-i Chinese Taipei tsür aser taoba mapang world champion Nien-Chin Chen tsükdaktsür sülen la semifinal tongtetogo.

Hokolbarnü, boxing asayamung tetsür welter weight 69kg category quarter final nung, Assam nungi arishi küm 23 tain boxer Lovlina-i 4-1 agi Nien koka semi final tongteta liasü. Lovlina-i world champion Turkey tsür Busenaz Surmeneli den semifinal asayatsü.

Quarter final bout tanga ka nung Busenaz-i Ukraine tsür Anna Lysenko madak takok nguogo.

World championship nung anaben bronze-medal takok angula, Lovlina-i tejashi kecha mesayui süngjema dang Nien den asaya. Taoba asayamung nung Nien-i Lovlina tsükdakja lir.

Lovlina-i counter-attack tasa amshia asaya aser iba bout koktetsü atema asaya atemtsü minute asem lia, lai defence tsütsü aziüoka asaya.

"Lovlina aso-ajen talang asüba yong maonga aika agitet aser lai counter-attack tasa junga amshia asayaogo. Taoba bout nung Lovlina-i kanga dang sashia Nein den tsüngteptsü merang aser lai tamakok angu. Ajiasünung, onoki la dang tan Olympics nungbo - 'nai tamasa la (Nien) asaya yimyattem lazükang aser iba sülen nai asayang' ta onoki la dang ashi," ta national coach Mohammed

Ali Qamar-i ashi.

"Ashiba ama Lovlina-i maritep aser kanga dang süngjema asaya liasü. Lai aritepa mesüra tejashi nung Nien dak metsüngoktsü. Onoki la dang ashiba ama, lai shitak inyakogo. Ashiko, lai mezüing yongi tashi agüja aser sashia asayatsü tenzük asübo, Nein-i la dak aiben tsüngoktsür lila," ta Qamar-i ashi.

Taoba küm Covid-19 ajanga asayamung nung shilem agitsü maongka mengutetba den külemi Europe nunga training magiteti arur sülen Lovlina-i iba Games nung shilem agir asütsü. Iba asaya temer sülen, referee-i Lovlina teka ajungkettsüba mapang, tepela nung lai ola tulu adoka ayimtem.

Sports Authority of India indang Padum Boro-i Golaghat district nung Lovlina majurudang, lai kickboxing asaya liasü.

Boro ajanga Lovlina-i Boxing asaya nung ajemoka liasü aser 2018 küm World championship nung lai mezüing shilem agiba mapang, lai bronze medal takok angu. Iba sülen küm ka lir kasa asayamung nung Lovlina-i ano Bronze medal ka ngua liasü.

Asian Championship asayamung ana tashi nung Lovlina-isa bronze medal ana takok ngudanga lir.

Taoba Olympic nung, India atema Vijender Singh (2008) aser MC Mary Kom (2012) nati medal takok ngua lir. Singh aser Mary nati bronze medal kokogo

aser tan Tokyo Summer Olympics 2020 nung Borgohain-i tajungba shilem agia temaba medal angutsü teimla lir.

Kasa boxing asayamung - tetsür 60kg category pre-quarterfinal tetoktepa nung, Simranjit Kaur (60kg)-i Thailand tsür Sudaporn Seesondee makok.

Iba bout nung arishi küm 26 tain Kaur-i kanga meranga asaya, saka Sudaporn-i 5-0 agi Kaur tsükdaktsü. Mezüing round nung Kaur-i junga asaya tenzük aser lai counter attack tasa amshia Seesondee den asaya liasü.

Ajisüaka, tetendanger (judges) temi Thailand tsür Sudaporn pusema telemtetba agütsü. Iba sülen, tanabuba round nung Simranjit-i mekümdangi asaya aser round tenzükli Simranjit-i kanga sashia asayaba yong la akoksadaktsüsa atongtet, kong Sudaporn-i Simranjit arakzüba yimyattem lazüka ata aser maongka angudang la teka abilen agi Simranjit dak tsüngoktsü.

Iba round nung, Simranjit-i defence tsütsü mekümdangi asayaba yong maongka magitet aser tasembuba round nunga lai kanga meranga toktepa asaya. Ajisüaka, 'unanimous verdict' ajanga lai iba bout mekoktet.

Arishi küm 29 tain Sudaporn-i World Championship nung anaben tashi gold medal ngua lir aser 2018 Asian Games asayamung nunga lai silver medal kokogo.

Bangladesh nung COVID den...

"Wave pattern" ka mechi taküm dengue cases ya tali lir, ta DGHS Non-Communicable Disease Control (NCDC) unit nung director, Dr Md Robed Amin-i ashi.

"Dengue cases ya küm ana nung khen timba akumer. 2019 küm dengue cases kanga sashia liasü, anungji 2021 nung dengue cases tali akumtsü akok ta bilema liasü," ta pai ashi.

Linük nung dengue cases tali akumtsü, ta entomologist temi küm tetenzüklen tekum dangtsü shia liasü, ta Amin-i ashi.

"Iba atema DGHS ajanga civic body tem nem tapet mera

agitsü atema parnok indang report ya agüja liasü, aser item rongnung merila aziüoktsü asoshi mera balala agitsü aser awareness sentongtem dena liasü," ta pai ashi.

Bangladesh nung dengue tensa ya August ita tamajungba akumtsü, ta entomologist Kabirul Bashar-i asadanteta lir, saka Dhaka administration ajanga iba tashidak aziüoktsü meranga maparen balala inyakba atema pelaba lemsatet.

"Dhaka nung corporation anati merila nütsüing aziüoktsü asoshi kanga yakyaka inyakba

ni nguogo. Parnok inyaksangshi nung tenokdangba mesüra timtem majurui aonungbo dengue cases ya ajemtsü akok," ta pai ashi.

Dhaka North City Corporation indang chief health officer, Brigadier General Jobaidur Rahman-i osangbener dang ashiba agi, linük tesem ajungalen parnoki mürekmejuba maparen tenzükogo.

"Dengue cases tali akumba onoki kanga süoki ia agizüker. August ita iba tashidak tali mekümdaktsütsü asoshi onoki tashi ajunga amshia inyaker," ta pai ashi.

Tokyo Olympics: PV Sindhu semi final-i iogo

Tokyo, Chiteni/July 30, 2021
(Agencies): Hokolbarnü, Tokyo Olympics badminton asayamung tetsür kija quarter final asaya nung, PV Sindhu-i World no. 5 Japan tsür Akane Yamaguchi tsükdaktsür sülen, lai tanabuba Olympic medal takok angutsü asoshi lenmang yangluogo.

Musashino Forest Plaza nung, tetsür badminton quarter final asayaba mapang, arishi küm 26 tain Sindhu, shibai 2016 Rio Olympics nung silver medal takok angu, lai 21-13 22-20 agi Yamaguchi kokogo. Iba asaya minute 56 nung tembang.

Sindhu-i Chinese Taipei tsür Tai Tzu Ying den semifinal asayatsü. Tetsür kija quarter final asaya tanga ka nung Tai Ying-i Thailand tsür Intanon madak 23-25, 21-12, 21-9 agi akok.

"Ni kanga dang pelar, saka ano

teinyaktsü anüngdaka lir. Taruba asaya atema anisüngzüka aser renemshitsüla. Iba asaya koka semifinal tongtetba atema pelar, saka taruba asaya atema tajungtiba renemshitsü nüngdaker," ta asaya temer sülen, Sindhu-i ashi.

"Iba jenjang tongtettsüsa meranga asaya aruogo ta bilemer aser iba tetoktepa ano matem lir; aser taruba asaya atema ni tali temulung agüja renemtsüla. Taruba round ji kanga dang tongtibang," ta lai ashi.

"Serve kar nung mapang agia asayaogo. Tanabuba game kanga tongtibang liasü. Point ishikati ni tejakdang ser asaya liasü aser Akane-i toktepa point anguba yong, ni süngjema asayatsü maongka aika mangu. Iba den külemi shilem kar nung mekümdangi ni aibelenadok," ta Sindhu-i shisem.

Tokyo Olympics: India hockey team anapronglai takok angu

Tokyo, Chiteni July 30, 2021
(Agencies): Tokyo Olympics - tebur hockey Group A nung tanabuba jenjang tongtettsü asoshi, Hokolbarnü India tebur team-i 5-3 agi asayamung ayonger telok - Japan tsükdaktsüogo. Iba group nung Australia team-i asaya pungo nungi point 13 tashi ngua temaba jenjang tongteta lir.

Iba Games nung Japan madak takok anguba densema, India tebur team-i asaya asem tashi atonga takok angur asütsü. Brehostibarnü, Captain Manpreet Singh-i aniba team-i defending champion Argentina madak 3-1 agi kokogo.

Oi Hockey Stadium nung asayaba mapang, quarterfinal berth ngur alir India team atema, Gurjant Singh (17th, 56th), Harmanpreet Singh (13th), Shamsher Singh (34th) aser Nilakanta Sharma (51st) nungeri goal idaktsü. Deobarnü quarter final asayatsü.

India tetsür team-i Ireland kokogo

Quarter final atema qualify asütsü teimla tulu yur India tetsür hockey team-ia maneni meranga asaya arudar. Hokolbarnü, Oi Hockey Stadium North Pitch kübok tetsür Pool A nung India tetsür team-i goal 1-0 agi Ireland kokogo.

Imlaa ataba ama, India team-

i Ireland team amokbanger asaya, saka team kati dang goal meinoktsütet. Asaya atemtsü minute 3 dang anünga lia, Navneet Kaur-i India atema goal ka idaktsü. Iba asaya nung, India-i penalty corner 14 nungi goal ka danga meinoktsütet aser 'field goal' ajanga parnoki goal ka idakja liasü.

Tokyo Games nung, India tetsür hockey team asemnen tashi atonga tamakok ngur sülen, parnoki mezüing point nguogo. Quarter final tongtettsü atema, Honibarnü India team-i South Africa akoktsüla.

Olympic asayamung tenzüka, India tetsür team-i mezüing Netherlands den asaya saka 5-1 agi parnok tsük. Tanabuba asaya nung Germany-i 2-0 aser tasembuba asaya nung Great Britain-i 4-1 agi India koka liasü.

Küm 36 nung, India tetsür hockey team-i Olympics nung asayatsü maongka ngua, 2016 Rio Olympics nung parnoki mezüing shilem agiogo. Rio Olympics - hockey group stage asaya pungo nungi asaya ka dang takok anguba sülen, parnok tsükadok.

Bhubaneswar nung qualifier asayaba mapang, India team-i United States madak aggregate nung 6-5 agi takok anguba sülen Tokyo Olympics nung asayatsü temsüa aküm.

NLA session atema...

Testüiba küm ka ser tesadang ka shi COVID-19 wara ajanga Nagaland rongsenketzüng nung tetsükdaktsü ajuruba onüktem atema sorkari olemteptsü ta osang angazüker.

NPF MLA tem nungi tasüngdangba 27 tashi Assembly Secretariat tonggogo. COVID-19 wara ajanga SOP sülen anidakba

(Tapak 1 nungi...)

Assembly session alitsü. Assembly session nung adener ajaki COVID-19 vaccine mezüing dose bosa agir asütsüla mesüra session metenzükdang ghonda 72 jelia COVID-19 test indang negative result bener arutsüla.

August 3, 2021 anepdang 9:30 ako nungi 13 buba NLA indang Session Tibuba tenzüktsü.

BILEMDANGANG

"Apetetben inyakba mapaji talangka noktaka malir."